

**Tuatahi : Ko te Whakatapu i te Hapati.**

He mea tika rawa te whakatapunga i tetahi ra o te wiki, he aroha no te Atua ki te tangata, he mohio no te Atua e kore te tangata, e ora ki te mahi tonu ki te kore e okioki. Kaore he mea e ora ki te kore e okioki. Ko te whakatapu i te Hapati tetahi o nga pou o te whakapono. Mahi tonu te kainga i te Ra Tapu he hau-hau ranei he kore karakia ranei. Ko te Hatarei to te Ringatu tona Ra Tapu engari hoki mahi tonu ai ratou i te Hatarei. Mahi ai nga pakeha karakia-kore i te Ra Tapu, otira e te iwi kua tatou e aru i a ratou kei te mohio tonu tatou he he tera. Ki te whakatapu tatou i te Hapati ka ui a tatou tamariki ki te take, ka-tohi tatou ka whakaatu na te Atua i whakatapu. Na, ka wkakaakona e ta tatou whakatapunga i te Hapati a tatou tamariki kia mohio ki te Atua, ka mohio hoki ratou he wahi tatou no te Atua. Koia nei ra e te iwi kua e turakina tenei pou-rohe o to tatou whakapono hei titiro ma o tatou uri. He oha te Ra Tapu na o tatou tupuna na o tatou matua, i tino whakatapua nei e ratou, heoi "kua e nekehia kētia." "Me whakarite ano e koutou aku hapati : hei tohu hoki ki te takiwa oku o koutou, puta noa i o koutou whakatapuranga." (Ekor. xxxi, 13)

**Tuarua : Ko te Pupuri i te Kupu a te Atua.**

He mea e tino marauna ana, ko nga whe-nua kahore i te korero i te kupu a te Atua kei te heke ki te kino e kore rawa e tupu te whakapono o te tangata e kaha ranei ia ki te tu ki te hoa riri mehemea kahore ia i te korero, i te pupuri i te kupu a te Atua. "Otira kaore kau he painga o te korero noa iho i nga Karaipiture ki te kore e tohutohungia e te wairua o te Atua," e kore hoki te tangata i te ngakau maori e tango i nga mea o te Wairua o te Atua. . . e kore ano hoki e ahei te matau, ma te Wairua hoki ka kitea ai." (1 Kor. ii, 14). E rongu ana tatou ki etahi tangata mohio ki nga Karaipiture, otia ko to ratou mohi-

otanga kei te mahunga anake kahore i te ngakau, na reira kotiti ke ta ratou whakamaoritanga i nga Karaipiture.

Ka kite au i te Paipera i te whare ka penei toku ngakau e korero ana nga tangata o tenei whare i te kupu a te Atua, he wahi to te Atua kei tenei whare, ina hoki te pou e whakaatu nei.

I te mea ka po ka haere tetahi tangata raua ko tana tama ki te whare o tetahi kaumatua moe ai, otira i wehi raua na reira i tetahi e moe ana, ka ara tonu tetahi. I te ohonga ake o te papa ka kite i te tama e moe ana, katahi ka ui ki te take i moe ai ia, ka mea ake te tama, "E pai ana, i kite atu ahau i te kaumatua na e korero ana i te Paipera." Ae i kitea te pou-whe-nua a te Atua ki te whare o tenei kaumatua.

I te whakawahinga i a Kingi Eruera i hoatu e te Akepihopa o Kanatipere te Paipera ki tona ringa me te mea atu, "Ka hoatu e matou ki a koe te mea nui atu i te ao." He mea tuturu tenei ko te iwi e mau ana ki te "mea nui atu i te ao" e nui ano i te ao. "Whakatakina nga tikanga o nga Karaipiture" (Hoa. v, 39; tiro Mahi xvii, 11.)

**Tuatora : Ko nga Whare Karakia.—**

Ka tu he whare karakia ki te kainga ka mohiotia he kainga karakia, ka kore he whare-karakia ka ui te ngakau, "He hau-hau pea tenei iwi?" Otira he nui nga whare karakia e tu noa iho ana kahore e manaakitia ana. I te pakarutanga o tetahi kaupuke ka u nga tangata ki tetahi motu i mohiotia he iwi kai tangata nei o reira, wehi ana taua hunga. I piki tetahi o ratou ki tetahi pukepuke ki te titiro i te ahua o te motu, ki te titiro hoki me kore e kitea he mangumangu. Eke kau atu taua tangata kua heke iho me te umere. He aha te take i umere ai ia? He kitenga atu nana i tetahi whare he ripeka i runga, mohio ana ia he whare-karakia, kua kauwhautia te Rongo-Pai ki tena motu, a kua